

दिनांक 06.11.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी रो राष्ट्रीय गीत 'वंदे मातरम्' रा डोढ़ सौ साल पूरा व्हेवण रा सिलसिला मांय एक साल ताई मणाया जावण वाळा स्मरणोत्सव री काल नई दिल्ली मांय सरूआत करण रो कार्यक्रम।
- प्रदेश मांय सगळी सरकारी स्कूलां अर पंचायत मांय काल ऊं कामकाज वन्दे मातरम् गीत गावण सागे सरू व्हेला।
- अंता विधानसभा सीट माथे उपचुनाव सारु 11 नवम्बर ने पड़बा वाळा वोटां बाबत प्रचार तेज व्ह्यो।

अर

- नगरीय विकास विभाग सड़कां माथे हिफाजत तैय करण सारु सड़कां, फुटपाथ अर डिवाइडरां माथे गैर कानूनी कब्जा हटावण रो अभियान चलायो।

000

प्रधानमंत्री नरेंद्र मोदी रो राष्ट्रीय गीत 'वंदे मातरम्' रा डोढ़ सौ साल पूरा व्हेवण रा सिलसिला मांय एक साल चालण वाळा स्मरणोत्सव रो काल नई दिल्ली मांय उद्घाटन करण रो कार्यक्रम है। संस्कृति मंत्रालय री ओर ऊं ओ कार्यक्रम आवता साल 7 नवम्बर ताई चलायो जावेला। उद्घाटन कार्यक्रम मांय 'वंदे मातरम्' रा डोढ़ सौ साल रा इतिहास रा बारा मांय प्रदर्शनी लगायी जावेला। ई सागे ई एक नान्ही फिल्म बतायी जावेला अर स्मारक डाक टिकट अर यादगार सिक्को ई जारी कर्यो जावेला। प्रदेश मांय ई ई सिलसिला मांय कार्यक्रम राख्या जावेला। राज्य स्तर रो आयोजन जयपुर रा सवाईमानसिंह स्टेडियम मांय व्हेला। जिला मुख्यालयां माथे ई राष्ट्रीय गीत वन्दे मातरम् री वर्षगांठ जळसा सागे मनायी जावेला। ई सिलसिला मांय सगळी सरकारी स्कूलां अर पंचायती राज विभाग रा सगळा दफतरां रो काम काल ऊं वन्दे मातरम् गीत सागे सरू व्हेला, जदके सिंज्या री पोर छुट्टी ऊं पैली राष्ट्र गान 'जन गण मन' गायो जावेला। शिक्षा अर पंचायती राज मंत्री मदन दिलावर कह्यो के ई फैसला ऊं देश प्रेम री भावना बधेला। ई सागे ई राज्य री सगळी स्कूलां मांय राष्ट्र गान वंदे मातरम् री डोढ़ सौ वीं वर्षगांठ रे मौके देशभक्ति ऊं जुड़्या न्यारा-न्यारा कार्यक्रम राखण रा हुकम दिया ज्या है। शिक्षा निदेशालय रे मुजब राज्य, जिला अर ब्लॉक लेवल माथे जनता रा नुमाइंदा, अहलकार, विद्यार्थी, अध्यापक अर विद्यार्थियां रा मायतां री भागीदारी ऊं वंदे मातरम् गीत रा बारा मांय वाद-विवाद, निबंध लेखन, देशभक्ति गीत, सांस्कृतिक कार्यक्रम राख्या जावेला अर रैलियां निकाळी जावेला।

000

बिहार विधानसभा चुनाव रा पहला दौर मांय आज 18 ज़िलां री 121 सीटां माथे वोट पड़या। सिंज्या पांच बज्यां ताई 60 फीसदी वोट पड़बा रा समाचार है। ई बीचे बारां ज़िला री अंता विधानसभा सीट माथे 11 नवम्बर ने व्हेवण वाळा उपचुनाव सारु सियासी हलचल लगातार बध रही है। भारतीय जनता पार्टी रा उम्मीदवार मोरपाल सुमन री हिमायत मांय मुख्यमंत्री भजनलाल शर्मा आज मांगरोल मांय उपमुख्यमंत्री प्रेमचंद बैरवा अर राज्य री पैली वाळी मुख्यमंत्री वसुंधरा राजे सागे रोड़ शो कीनो। ई मौके मुख्यमंत्री कह्यो के जनता री समस्यावां आगी करणो सरकार रो कर्तव्य है।

000

राज्य मांय वोटर लिस्टां रा गहन पुनरीक्षण अभियान-एसआईआर रा तैत सर्वे करायो जा रह्यो है। उदयपुर री संभागीय आयुक्त प्रज्ञा केवलरमानी वीडियो कॉन्फ्रेंसिंग रे मार्फत इण रा काम रो जायजो लीनो अर अहलकारां ने आईटी हेल्प डेस्क अर स्वयंसेवक सहायता डेस्क बणावण समेम ज़रूरी हुकम दीना। डीग ज़िला मांय ई चाल रह्या एसआईआर रा तैत जिला निर्वाचन अधिकारी बरगलावण वाळी जाणकारियां माथे ध्यान नी देवण अर अभियान रा काम मांय मदद करण री अपील कीनी है। पाली रा ज़िला निर्वाचन अधिकारी बतायो के ज़िला मांय पुनरीक्षण कार्यक्रम रा तैत नवाचार करी ज्यो है, जिण ऊं बूथ लेवल अहलकार-बीएलओ ने वोट देवण रा हकदार किण ई जणा रो नाम हेरबा मांय आसानी व्हेला।

000

लोकसभा अध्यक्ष ओम बिरला कोटा मांय आयुर्वेद, योग अर प्राकृतिक चिकित्सा महाविद्यालय रो नुवो भवन आज जनता ने सूंप्यो। पैली वाळा सांसद वैद्य दाऊदयाल जोशी रा नाम परां खोली ज्यो ओ कॉलेज बणावण माथे करीब 21 करोड़ 89 लाख रुपया रो खर्चो आयो है। ओ कॉलेज भवन प्रदेश मांय मंजूर करी ज्या 6 आयुर्वेद कॉलेजां मांय सब ऊं पैली तैयार व्ह्यो है, जिण मांय साढे चार सौ विद्यार्थी पढ़ सकेला। ई मौके श्री बिरला कह्यो के ओ कॉलेज स्वास्थ्य शिक्षा ने नुवी दिशा देवेला।

000

केंद्रीय संस्कृति अर पर्यटन मंत्री गजेन्द्र सिंह शेखावत भारत रे बेगो ई दुनिया री तेजी मोटी माली व्यवस्था बणबा रो भरोसो जतायो है। वे आज श्रीनगर मांय राख्यी ज्यी अंतर्राष्ट्रीय संगोष्ठी मांय बोल रह्या हा। श्री शेखावत कह्यो के साल 2047 ताई देशी रा सकल घरेलू उत्पाद-जीडीपी मांय सैर-सपाटा री हिस्सेदारी 10 फीसदी करणो तय करी ज्यो है। वे नौजवानां ऊं सैर-सपाटा ने स्थायी अर विकेन्द्रीकृत बणावण बाबत कह्यो।

000

नगरीय विकास विभाग सगळा निकायां मांय सड़कां माथे हिफाजत तैय करण सारु खास अभियान चलायो है। ई अभियान रो मकसद फुटपाथ अर सड़कां माथे गैर-कानूनी कब्ज़ा हटावणो, अनाधिकृत रोड़ कट बंद करणा अर डिवाइडर अर फुटपाथ री मरम्मत करणो है। ई सागे ई आवण-जावण ऊं जुड़ी जाणकारी देवण वाळा बोर्ड लगावण अर मैनहोल रा टूट्योड़ा ढक्कण ठीक करण रा काम ई कर्या जावेला। संबंधित नगरीय निकाय ने सीबीयूडी एप माथे खुदाई रा कामां रो ब्यौरो देवणो ज़रूरी व्हेला।

000

उत्तर-पश्चिम रेलवे रा जयपुर मंडल रा रेल प्रबंधक-डी.आर.एम. रवि जैन आज झुंझुनू रेलवे स्टेशन माथे अमृत स्टेशन योजना रा तैत कराया जा रह्या कामां रो जायजो लीनो। ई मौके वे सगळा काम बेगा पूरा करण री बात कही।

000

आईसीसी विश्व कप होड़ जीतण वाळी भारत री महिला क्रिकेट टीम आज राष्ट्रपति द्रौपदी मुर्मू सागे भेंट कीनी। राष्ट्रपति सोशल मीडिया पोस्ट मांय टीम ने बधाई देता थकां कह्यो के वा इतिहास रच्यो है अर नौजवान पीढ़ी सारु मिसाल बण गयी है। राष्ट्रपति टीम रा सगळा सदस्यां रा काम री सराहवणा करता थकां टीम कानी ऊं कामयाबी रा नुवा रिकॉर्ड बणावाण री कामना कीनी।

000

लौहपुरुष सरदार वल्लभभाई पटेल री डोढ़ सौवीं जयंती रा सिलसिला मांय बालोतरा मांय 14 नवंबर मांय "सरदार / 150 यूनिटी मार्च" राख्यो जावेला। इण रा सरुआती दौर मांय माई भारत अभियान रा तैत निबंध लेखण अर दूजी होड़ां राख्यी जा रही है।

000

भगवान बिरसा मुंडा री जयंती रा सिलसिला मांय मनाया जा रह्या जनजातीय गौरव पखवाड़ा रा तैत आज जयपुर कने बस्सी पंचायत समिति मांय महिलावां ने खुद रा काम-धंधा सरु करण मांय मदद देवण सारु खिलौना बणावण री सिखावण कार्यशाला राख्यी ज्यी। कोटपूतली-बहरोड़ रा लड़कियां रा कॉलेज मांय भगवान बिरसा मुंडा री जिन्दगी रा बारा मांय बणायी ज्यी नान्ही फिल्म बतायी ज्यी। सिरौही जिला रा सिवाना मांय दो दिन री मल्टीमीडिया प्रदर्शनी लगायी जा रही है, जिण मांय जनजातीय गौरव दिवस रा बारा मांय पैनल प्रदर्शनी लगायी ज्यी है। ई रा तैत जीएसटी बचत उत्सव अर केन्द्र सरकार कानी ऊं चलायी जा रही जनता रा भला री योजनावां री जाणकारी ई दीरीजी। ई सिलसिला मांय राज्य स्तर रो जळसो डूंगरपुर मांय राख्यो जावेला। इण री तैयारियां रो जायजो लेवण सारु जिला कलेक्टर अहलकारां सागे मीटिंग कीनी।

000

सवाईमाधोपुर जिला मांय मलारना टेशन कने ओलवाड़ा रपट माथे काल बनास नदी मांय बह ग्या एक ही पिरवार रा दो जणां ने बचावण रो अभियान चलायो जा रह्यो है। इसरदा बंधा ऊं बत्तो पाणी छोडण रे कारण बनास नदी मांय पाणी रो लेवल बध जावण ऊं ओ हादसो व्ह्यो। ऐचेर बगीना रपट माथे ई एक मोटरसाइकिल सवार रे बह जावण रा समाचार है, जिण री तलाश करी जा रही है।

000

जयपुर मांय चलाया जा रह्या सक्षम जयपुर अभियान रा तैत चौमूं कने हाड़ौता री सरकारी स्कूल मांय आज नारी चौपाल लगाई ज्यी। इण मांय मोटी तादाद मांय पूगी टाबरियां अर महिलावां लोक नृत्य, नुक्कड़ नाटक अर खुद री हिफाजत री सिखावण रे मार्फत हुनर अर खुद माथे भरोसा रो दरसाव कीनो। महिला अधिकारिता विभाग रा उपनिदेशक बतायो के चौपाल मांय न्यारा-न्यारा महकमां रा अहलकार स्वास्थ्य, भणार्ई-लिखाई, हिफाजत अर खुद रा काम-धंधा सरीखा मुद्दां माथे चर्चा करी ज्यी अर सरकार कानी ऊं जनता रा भला सारु चलायी जा रही भांत-भांत री योजनावां री जाणकारी दीरीजी। ई मौके 'बेटी बचाओ-बेटी पढ़ाओ' री शपथ ई दिरायी ज्यी।

000